

官常典第四百九十三卷

將帥部名臣列傳五十一

唐四 王君奐

按唐書本傳君奐字威明瓜州常樂人初事郭知運爲別奏累功至右衛副率知運卒代爲河西隴右節度使右羽林軍將軍判涼州都督事開元十四年吐蕃曾悉諾邏寇大斗拔谷君奐聞其怠率秦州都督張景順乘冰度青海襲破之以功遷大將軍封晉昌縣伯拜其父壽爲少府監聽不事君奐凱旋元宗宴君奐及妻夏於廣達樓賜金帛夏亦自以戰功封武威郡夫人俄而吐蕃陷瓜州執刺史田元獻及壽殺唐人取資糧進攻玉門軍使人嘲君奐曰將軍常自以忠勇今不一進戰奈何君奐登陴西向哭兵不敢出初涼州有回紇契苾思結渾四部世爲酋長君奐微時數往來爲所輕及節度河西回紇等頗鞅鞅恥爲下君奐怒數督過之既怨望潛遣人至東都言狀君奐聞驛奏四部有叛謀帝使中人卽訊回紇不能自直於是瀚海大都督回紇承宗流灊州渾大得流吉州賀蘭都督契苾承明流藤州廬山都督思結歸國流瓊州而承宗黨瀚海州司馬護輸等益不平思有以

復怨會吐蕃使間道走突厥君莫率騎到肅州掩取得之還至甘州護輸狙兵發奪君莫節殺左右親吏剖其心曰是始謀者君莫引帳下力戰兵盡乃死輸欲以尸奔吐蕃追兵至乃棄尸去帝痛惜之贈特進荊州大都督以喪還京師官護其葬詔張說刻文墓碑帝自書以寵之

李嗣業

按唐書本傳嗣業字嗣業京兆高陵人長七尺膂力絕衆開元中從安西都護來曜討十姓蘇祿先登捕鹵累功署昭武校尉後應募安西軍中初用陌刀而嗣業尤善每戰必爲先鋒所嚮摧北馬靈嘗爲節度出戰必與俱高仙芝討勃律署嗣業及中郎將田珍爲左右陌刀將時吐蕃兵十萬屯娑勒城據山瀕水聯木作郛以扼王師仙芝潛軍夜濟信圖河令曰及午破賊不者皆死嗣業提步士升山頽石四面以擊賊又樹大旗先走險諸將從之鹵不虞軍至因大潰投崖谷死者十八鼓而驅至勃律禽其主平之授右威衛將軍從平石國及突騎施以跳盪先鋒加特進鹵號爲神通大將初仙芝特以計襲取石其子出奔因構諸胡共怨之以告大食連兵攻四鎮仙芝率兵二萬深入爲大食所敗殘卒數千事急嗣業謀曰將軍深履賊境後援旣絕而大食乘勝諸胡銳於鬪我與將軍俱

前死尙誰報朝廷者不如守白石嶺以爲後計仙芝曰吾方收合餘燼明日復戰嗣業曰事去矣不可坐須蒞醢卽馳守白石路旣隘步騎魚貫而前會拔汗那還兵輜餉塞道不可騁嗣業懼追及手挺鑿擊人馬斃仆者數十百鹵駭走仙芝乃得還表嗣業功進右金吾大將軍留爲疏勒鎮使城一隅隨屢築輒壞嗣業祝之有白龍見因其處龜祠以祭城遂不壞漢耿恭故井久涸禱已泉復出初討勃律也通道葱嶺有大石塞隘以足蹶之抵穹壑識者以爲至誠所感云天寶十二載加驃騎大將軍入朝賜酒元宗前醉起舞帝寵之賜綵百金皿五十物錢十萬曰爲解醒具安祿山反肅宗追之詔至卽引道與諸將割臂盟曰所過郡縣秋毫不可犯至鳳翔上謁帝喜曰今日卿至賢於數萬衆事之濟否固在卿輩乃詔與郭子儀僕固懷恩犄角常爲先鋒以巨梃笞鬪賊值類崩潰進四鎮伊西北庭行軍兵馬使廣平王收長安嗣業統前軍陣於香積祠北賊酋李歸仁擁精騎薄戰王師注矢逐之走未及營賊大出掩追騎還蹂王師於是亂不能陣嗣業謂子儀曰今日不蹈萬死取一生則軍無類矣卽袒持長刀大呼出陣前殺數十人陣復整步卒二千以陌刀長柯斧堵進所向無前歸仁匿兵營左覘軍勢王分回紇銳兵擊其伏嗣業出賊背合攻之自日中至昃斬首六萬級填

古今圖書集成
二
澗壑死幾半賊東走遂平長安進收東都嗣業戰多乃與張鎬魯炁來瑱嗣吳王祇李奐略定諸州兼衛尉卿封號國公實封戶二百兼懷州刺史北庭行營節度使與子儀等圍相州師耄諸將無功獨嗣業被堅數奮爲諸軍冠中流矢臥帳中方愈忽聞金鼓聲知與賊戰大呼創潰血流數升卒諡曰忠勇贈武威郡王給靈輿護送在所葬日使中人臨弔中朝臣祖泣塋給掃除十戶嗣業忠毅憂國不計居產有宛馬十四前後賞賜皆上於官以助軍云子佐國襲爵

王難得

按唐書本傳難得沂州臨沂人父思敬少隸軍試太子賓客難得健於武工騎射天寶初爲河源軍使吐蕃贊普子郎支都者恃趨敏乘名馬寶鈿鞍略陣挑戰甚閑暇無敢校者難得怒挾矛驟馬馳支都不暇鬪直斬其首元宗壯其果召見令殿前乘馬挾矛作刺賊狀大悅賜錦袍金帶累授金吾將軍從哥舒翰擊吐蕃至積石鹵吐谷渾王子悉弄參及悉頰藏而還復收五橋拔樹惇城進白水軍使收九曲加特進肅宗在靈武軍賞乏難得上家貲助軍試衛尉卿俄領興平軍及鳳翔兵馬使收京師方戰麾下士失馬難得馳救矢著眉披膚障目乃拔箭斷膚殊死前鬪血巖而不已帝嘉之

從郭子儀攻相州累封琅邪郡公爲英武軍使寶應二年卒贈潞州大都督

魯炁

按唐書本傳炁幽州薊人長七尺餘略通書史以蔭補左羽林長上隴右節度使哥舒翰引爲別奏
顏真卿嘗使隴右謂翰曰君興耶將總節制亦嘗得人乎炁時立階下翰指曰是當爲節度使從破
石堡城收河曲遷左武衛將軍後復以破吐蕃跳盪功除右領軍大將軍安祿山反拜上洛太守將
行於帝前畫攻守勢遷南陽太守兼守捉防禦使封金鄉公尋爲山南節度使以嶺南黔中山南東
道子弟五萬屯湓水南賊將武令珣畢思琛等擊之衆欲戰炁不可賊右趨乘風縱火鬱氣奔營士
不可止負扉走賊矢如雨炁與中人薛道挺身走舉衆沒賊時嶺南節度使何履光黔中節度使趙
國珍襄陽節度使徐浩未至其子弟半在軍挾金爲資糧至是與械偕棄與山等賊資以富炁擎散
兵保南陽潼關失守賊使哥舒翰招下不從使武令珣攻之令珣死田承嗣繼往潁川來瑱襄陽魏
仲犀合兵援炁仲犀弟孟馴兵至明府橋望賊走炁城中食盡米斗五十千一鼠四百餓者相枕藉
朝廷遣使者曹日昇宣慰加炁特進太僕卿不得入日昇請單騎致命仲犀不可會顏真卿自河北

至謂曰使者不顧死致天子命設爲賊獲是亡一使者脫能入城則萬心固矣中官馮廷瓌亦曰將軍必入我請以兩騎助仲犀益騎凡十輩賊望見知皆銳兵不敢擊遂入致命人心益固日昃復以騎趨襄陽領兵千由音聲道運糧餉晁故晁得與賊相持踰三月晁被圍凡一年晝夜戰人至相食卒無救至德二載五月乃率衆突圍走襄陽承嗣尾擊晁殊死戰二日斬獲甚衆賊引去俄拜御史大夫襄鄧十州節度使亦會二京平賊走河北時襄漢數百里鄉聚蕩然舉無樵煙初賊欲剽亂江湖賴晁適扼其衝故南夏以完策勳封岐國公實封二百戶乾元元年又加淮西節度鄧州刺史與九節度圍安慶緒於相州晁領淮西襄陽兩鎮步卒萬人騎三百明年與史思明戰安陽王師不利晁中流矢輒奔諸節度潰去所過剽奪而晁軍尤甚有詔來瑱節度淮西徙晁鄭陳毫節度使至新鄭聞郭子儀整軍屯穀水李光弼還太原晁羞惴仰藥死年五十七

王思禮

按唐書本傳思禮高麗人入居營州父爲朔方軍將思禮習戰鬪從王忠嗣至河西與哥舒翰同籍麾下翰爲隴右節度使思禮與中郎將周泌事翰以功授右衛將軍關西兵馬使從討九曲後期當

斬臨刑翰釋之思禮徐曰死固分也何復貸爲諸將壯之天寶十三載吐谷渾蘇毗王款附詔翰至磨環川應接思禮墜馬蹇甚翰謂監軍李大宜曰思禮跛足尙欲何之俄加金城郡太守安祿山反翰爲元帥奏思禮赴軍元宗曰河隴精銳悉在潼關吐蕃有釁惟倚思禮耳翰固請乃兼太常卿充元帥府馬軍都將翰委以軍事密勸翰表誅楊國忠翰不應復請以三十騎劫至潼關殺之翰曰此乃吾反何與祿山事潼關失守思禮與呂崇賁李承光同走行在肅宗責不堅守引至纛下將斬之宰相房瑄諫以爲可收後效遂獨斬承光赦思禮等尋副房瑄戰便橋不利更爲關內行營節度河西隴右伊西行營兵馬使守武功賊安守忠來戰思禮退保扶風賊分兵略大和關去鳳翔五十里李光進戰未利行在戒嚴從官潛出其孥帝使左右巡御史虞候識其姓名衆稍稍止命郭子儀以朔方兵擊之會崔光遠行軍司馬王伯倫判官李椿以兵二千屯扶風聞賊已西欲乘虛襲京師徑至高陵賊引軍還擊椿等椿已至中渭橋殺守者千人進攻苑門伯倫戰死椿被執先是賊餘衆留武功旣傳官軍入京師乃燒營遁自是賊不敢西長安平思禮先入清宮收東京戰數有功遷兵部尙書封霍國公食實戶五百尋兼潞沁等州節度乾元元年總關中潞州行營兵三萬騎八千與子

儀園賊相州軍潰惟李光弼思禮完軍還尋破史思明別將萬餘衆於直千嶺光弼徙河陽代爲河東節度副大使上元元年加司空自武德以來三公不居宰輔惟思禮而已二年薨贈太尉諡曰武烈思禮善守計短攻戰然持法嚴整士不敢犯在太原器甲完精儲粟至百萬斛云

高仙芝

按唐書本傳仙芝高麗人父舍鷄初以將軍隸河西軍爲四鎮校將仙芝年二十餘從至安西以父功補遊擊將軍數年父子並班仙芝美姿質善騎射父猶以其儒緩憂之初事節度使田仁琬蓋嘉運等不甚知名後事夫蒙靈訥乃善遇之開元末表爲安西副都護四鎮都知兵馬使小勃律其王爲吐蕃所誘妻以女故西北二十餘國皆羈屬吐蕃自仁琬以來三討之皆無功天寶六載詔仙芝以步騎一萬出討是時步兵皆有私馬自隨仙芝乃自安西過撥換城入握瑟德經疏勒登葱嶺涉播密川遂頓特勒滿川行凡百日特勒滿川卽五識匿國也仙芝乃分軍爲三使疏勒趙崇玘自北谷道撥換賈崇瓚自赤佛道仙芝與監軍邊令誠自護密俱入約會連雲堡堡有兵千餘城南因山爲柵兵九千守之城下據婆勒川會川漲不得渡仙芝殺牲祭川命士人齋三日繡集水涯士不甚

信既涉旗不露韜不濡兵已成列仙芝喜告令誠曰嚮吾方涉賊擊我我無類矣今既濟而陣天以賊賜我也遂登山挑戰日未中破之拔其城斬五千級生擒千人馬千餘匹衣資器甲數萬計仙芝欲遂深入令誠懼不肯行仙芝留羸弱三千使守遂引師行三日過坦駒嶺嶺峻絕下四十里仙芝恐士憚險不敢進乃潛遣二十騎衣阿弩越胡服來迎先語部校曰阿弩越胡來迎我無慮矣既至士不肯下曰公驅我何去會二十人至曰阿弩越胡來迎已斷娑夷橋矣仙芝卽陽喜令士盡下娑夷河弱水也既行三日越胡來迎明日至阿弩越城遣將軍席元慶以精騎一千先往謂小勃律王曰不闕若城吾假道趨大勃律耳城中大會領皆吐蕃腹心仙芝密令元慶曰若曾領逃者第出詔書呼之賜以繒綵至皆縛以待我元慶如言仙芝至悉斬之王及妻逃山穴不可得仙芝招喻乃出降因平其國急遣元慶斷娑夷橋其暮吐蕃至不克度橋長度一箭所及者功一歲乃成八月仙芝以小勃律王及妻自赤佛道還連雲堡與令誠俱班師於是拂菻大食諸胡七十二國皆震懾降附仙芝遣判官王庭芬奏捷京師軍至河西靈管怒不迎勞既見罵曰高麗奴子闕使爾何從得之仙芝懼且謝曰中丞力也又曰焉耆鎮守使安西副都護都知兵馬使皆何從得之答曰亦中丞力也

靈管曰審若此捷書不待我而敢卽奏何邪奴當斬顧新立功故貸爾仙芝不知所爲令誠密言狀於朝且曰仙芝立功而以憂死後孰爲朝廷用者帝乃擢仙芝鴻臚卿假御史中丞代靈管爲四鎮節度使而詔靈管還靈管懼仙芝朝夕見輒走趨靈管益慙副都護程千里衙將畢思琛行官王滔康懷順陳奉忠等皆嘗譖仙芝於靈管者旣視事呼千里慢罵曰公面雖男兒而心似婦女何邪謂琛曰爾奪吾城東千石種田憶之乎對曰公見賜者仙芝曰爾時吾畏汝威豈憐汝而賜邪又召滔欲粹辱良久皆釋曰吾不恨矣由是舉軍安之俄加左金吾衛大將軍與一子五品官九載討石國其王車鼻施約降仙芝爲俘獻闕下斬之由是西域不服其王子走大食乞兵攻仙芝於怛邏斯城以直其冤仙芝爲人貪破石獲瑟瑟十餘斛黃金五六橐駝良馬寶玉甚衆家貲累鉅萬然亦不甚愛惜人有求輒與不問幾何尋除武威太守代安思順爲河西節度使羣胡固留思順更拜右羽林軍大將軍封密雲郡公祿山反榮王爲元帥仙芝副之領飛騎驍騎及朔方等兵出禁財募關輔士五萬繼封常清東討帝御勤政樓引榮王受命宴仙芝以下帝又幸望春亭勞遣詔監門將軍邊令誠監軍次陝郡而常清敗還仙芝急乃開太原倉悉以所有賜士卒焚其餘引兵趨潼關會賊至甲

仗資糧委於道彌數百里既至關勒兵繕守具士氣稍稍復振賊攻關不得入乃引還初令誠數私於仙芝仙芝不應因言其逗撓狀以激帝且云常清以賊搖衆而仙芝棄陝地數百里賒盜稟賜帝大怒使令誠卽軍中斬之令誠已斬常清陳尸於邈蘇仙芝自外至令誠以陌刀百人自從曰大夫亦有命仙芝遽下曰我退罪也死不敢辭然以我爲盜頡資糧誣也謂令誠曰上天下地三軍皆在君豈不知又顧麾下曰我募若輩本欲破賊取重賞而賊勢方銳故遷延至此亦以固關也我有罪若輩可言不爾當呼枉軍中咸呼曰枉其聲殷地仙芝視常清尸曰公我所引拔又代吾爲節度今與公同死豈命歟遂就死

封常清

按唐書本傳常清蒲州猗氏人外祖教之讀書多所該究然孤貧年過三十未有名夫蒙靈詔爲四鎮節度使以高仙芝爲都知兵馬使嘗出軍奏僉從三十餘人衣襟鮮明常清慨然投牒請僉常清素瘠又脚踏仙芝陋其貌不納明日復至仙芝謝曰僉已足何庸復來常清怒曰我慕公義願事鞭勒故無媒自前公何見拒深乎以貌取士恐失之子羽公其念之仙芝猶未納乃日候門下仙芝不

得已竄名儼中會遠奚諸部叛自黑山西趣碎葉有詔邀擊靈管使仙芝以二千騎追躡達奚行達人馬疲禽馘略盡常清於幕下潛作捷布具記并泉次舍克賊形勢謀略條最明審仙芝取讀之皆意所欲出乃大駭卽用之軍還靈管迎勞仙芝已去奴祿帶刀而判官劉眇獨孤峻爭問向捷布誰作者公幕下安得此人答曰吾儼封常清也眇等驚進揖常清坐與語異之遂知名以功授疊州戍主仍爲判官仙芝破小勃律代靈管爲安西節度使常清以從戰有勞擢慶王府錄事叅軍事爲節度判官仙芝征討常知從務常清才而果胸無疑事仙芝委家事於郎將鄭德詮其乳母子也威動軍中常清常自外還諸將前謁德詮見常清始貴易之走馬突常清騎士去常清命左右引德詮至廷中門輒閉因離席曰吾起細微中丞公過聽以主留事郎將安得無禮因叱曰須暫假郎將死以肅吾軍因杖死以面仆地曳出之仙芝妻及乳母哭門外救請不能得遽以狀白仙芝仙芝驚及見常清憚其公不敢讓常清亦不謝會大將有罪又殺二人軍中莫不股慄仙芝節度河西復請爲判官久之擢安西副大都護安西四鎮節度副大使知節度事未幾改北庭都護持節伊西節度使常清性勤儉耐勞苦出軍乘驛私廐裁二馬賞罰分明天寶末入朝而安祿山反帝引見問何策以討

賊常清見帝憂因大言曰天下太平久人不知戰然事有逆順勢有奇變臣請馳至東京悉府庫募驍勇挑馬箠度河計日取逆胡首以獻闕下天子壯之明日以常清爲范陽節度副大使乘驛赴東京常清募兵得六萬人然皆市井庸保乃部分旗幟斷河陽橋以守賊移書平原令太守顏真卿以兵七千防河真卿馳使司兵參軍事李平入奏常清取平表發視卽倚帳作書遣真卿勸堅守且傳購祿山檄數十函與之真卿得以分曉諸郡祿山度河陷滎陽入盟子谷先驅至蔡園常清使驍騎拒之殺拓羯數十百人賊大軍至常清不能禦退入上東門戰不利賊鼓而進刼官吏再戰於都亭驛又不勝引兵守宣仁門復敗乃自提象門出伐大木塞道以殿至穀水西奔陝語高仙芝曰賊銳甚難與爭鋒潼關無兵一夫奔突則京師危不如急守潼關仙芝從之敗書聞帝削常清官使白衣隸仙芝軍効力仙芝使衣黑衣監左右部軍及邊令誠以詔書至示之常清曰吾所以不死者恐汙國家節度戮賊手今死乃甘心始常清敗徑入關欲見上陳討賊事至渭南有詔赴潼關常清憂懼爲表以謝且言自東京陷三遣使表論成敗不得對又言臣死後望陛下無輕此賊則社稷安至是臨刑以表授令誠而死人多哀之

論弓仁

按唐書本傳弓仁本吐蕃族也父欽陵世相其國聖曆二年弓仁以所統吐渾七千帳自歸授左玉鈐衛將軍封酒泉郡公神龍三年爲朔方軍前鋒游弈使時張仁愿築三受降城弓仁以兵出諾真水草心山爲邏衛開元初突厥九姓亂弓仁引軍渡漠踰白檀林收火拔部喻多真種落降之蹙跌思太叛戰赤柳澗弓仁騎才五百自新堡進時賊四環之衆不敵弓仁椎牛誓士自若再宿潰圍出人服其壯凡閱大小戰數百未嘗負賜寶玉甲第良田等列莫與比累遷左驍衛大將軍朔方副大使會病元宗遣上醫馳視卒年六十六贈撥川郡王諡曰忠

郭子儀

按唐書本傳子儀字子儀華州鄭人長七尺二寸以武舉異等補左衛長史累遷單于副都護振遠軍使天寶八載木刺山始築橫塞軍及安北都護府詔卽軍爲使俄苦地偏不可耕徙築永清號天德軍又以使兼九原太守十四載安祿山反詔子儀爲衛尉卿靈武郡太守充朔方節度使率本軍東討子儀收靜邊軍斬賊將周萬頃繫高秀巖河曲敗之遂收雲中馬邑開東陁加御史大夫賊陷

山常河北郡縣皆沒會李光弼攻賊常山拔之子儀引軍下井陘與光弼合破賊史思明衆數萬平
藁城南攻趙郡禽賊四千縱之斬僞守郭獻璆還常山思明以衆數萬尾軍及行唐子儀選騎五百
更出挑之三日賊引去乘之又破於沙河遂趨常陽以守祿山益出精兵佐思明子儀曰彼恃加兵
必易我易我心不固戰則克矣與戰未決戮一部將以徇士殊死鬪遂破之斬首二千級俘五百人
獲馬如之於是晝揚兵夜擣壘賊不得息氣益老乃與光弼僕固懷恩渾釋之陳回光等擊賊嘉山
斬首四萬級獲人馬萬計思明跳奔博陵於是河北諸郡往往斬賊守迎王師方北圖范陽會哥舒
翰敗天子入蜀太子卽位靈武詔班師子儀與光弼率步騎五萬赴行在時朝廷草昧衆單寡軍容
闕然及是國威大振拜子儀兵部尙書同中書門下平章事仍總節度肅宗大閱六軍鼓而南至彭
原宰相房琯自請討賊次陳濤帥敗衆略盡故帝唯倚朔方軍爲根本賊將阿史那從禮以同羅僕
骨騎五千誘河曲九府六胡州部落數萬迫行在子儀以回紇首領葛邏支擊之執獲數萬牛羊不
可勝計河曲平至德二載攻賊崔乾祐於潼關乾祐敗退保蒲津會永樂尉趙復河東司戶參軍韓
旻司士徐景及宗室子鋒在城中謀爲內應子儀攻蒲復等斬陴者披闔內軍乾祐走安邑安邑僞

納之兵半入縣門發乾祐得脫身走賊安守忠壁永豐倉子儀遣子旰與戰多殺至萬級旰死於陳進收倉於是關陝始通詔還鳳翔進司空充關內河東副元帥率師趨長安次潯水上賊守忠等軍清渠左大戰王帥不利委仗奔子儀收潰卒保武功待暉於朝乃授尙書左僕射俄從元帥廣平王率蕃漢兵十五萬收長安李嗣業爲前軍元帥爲中軍子儀副之王思禮爲後軍陣香積寺之北距澧水臨大川彌亙一舍賊李歸仁領勁騎薄戰官軍蹶嗣業以長刀突出斬賊數千騎乃定回紇以奇兵繚賊背夾攻之斬首六萬級生禽二萬賊帥張通儒夜亡陝郡翌日王入京師老幼夾道呼曰不圖今日復見官軍王休士三日遂東安慶緒聞王師至遣嚴莊悉衆十萬屯陝助通儒旌幟鉦鼓徑百餘里師至新店賊已陣出輕騎子儀遣二隊逐之又至倍以往皆不及賊營輒反最後賊以二百騎掩軍未戰走子儀悉軍追橫貫其營賊張兩翼包之官軍却嗣業率回紇從後擊塵且益飛矢射賊賊驚曰回紇至矣遂大敗僵尸相屬於道嚴莊等走洛陽挾慶緒度河保相州遂收東都於是河東河西河南州縣悉平以功加司徒封代國公食邑千戶入朝帝遣具軍容迎灞上勞之曰國家再造卿力也子儀頓首陳謝有詔還東都經略北討乾元元年破賊河上執安守忠以獻遂朝京師